

EX-GOBERNADOR FELIPE TROMP A HAYA REGALO DI DESPEDIDA



ORANJESTAD [AAN] Recientemente Ministro Nicolaas cu tin e cartera di Transporte y Tele-Comunicacion, hunto cu e Servicio Postal di Aruba a haci entrega di un regalo di despedida na Sr. Felipe Tromp, ex-gobernador di Aruba. E regalo ta un cuadro di 100 aña di existencia di

Servicio Postal cu stampa y "eerste dag envelop" cu a ser emiti den cuadro di e celebracion menciona na e muy distinguido persona di Sr. Felipe Tromp como aprecio pa e periodo cu su persona a fungi como Gobernador di Aruba.

Presente na e ocasion aki tabata drs. E.S. Morales, Director di e Servicio Postal,

Franklin Croes, Director Interino, Rudolf de Kort, Consehero, Stanley Zaandam,

Coordinador di e Ministerio di Transporte y Tele-comunicacion, sra. Vivian Alberto-Clarke, supervisor servicio filatelico, y Hector Quilotte, funcionario di e Servicio Postal.

Watty Vos a presenta pruebanan dilanti Juez ACTITUD DI PROMER MINISTRO MES A PONE HENDE PERDE RESPET PE

ORANJESTAD (AAN): "Respet pa un Promer Ministro mester worde existi dor di su propio hechonan." Esaki ta palabranan cu Watty Vos a usa dilanti Huez den su defensa den e caso cu Nelson Oduber a cuminsa contra su persona pasobra e palabra Narcocomplaciente a worde usa den un titulo di un articulo hunto cu e nomber di Nelson Oduber.

Watty Vos a bisa Huez cu ningun hende por carga e culpa cu Nelson Oduber ta worde critica pa e actitud pasivo cu el a tuma y cu e no kier tuma medida pa clarifica tur e acusacionnan contra su Gobierno y su partido. Watty Vos a produci copianan di publicacionnan den cual e actitud pasivo di Nelson Oduber ta keda presenta. E falta di forza di Nelson Oduber ta haci cu e ta worde hasta ridiculiza.

E falta di accion di Nelson Oduber ta pone cu henter e pais ta worde perhudica. Su actitud como persona cu ta duna ehemplo ta pone cu moral na Aruba ta baha manera Watty Vos a bisa Huez.

E critica fuerte cu un sindicalista a lanza ariba Gobierno na fin di aña tambe a keda presenta dilanti Huez. E sindicalista aki a acusa Gobierno di corrupcion. Enbez di tuma medida contra esnan señala y investiga asuntonan Promer Ministro Oduber a defende e personanan aki y a ataca e sindicalista.

Actuacion di Promer Ministro Oduber tambe ta pone perde respet. Watty Vos a muestra con promer cu e conferencia di droga cu a tuma lugar na Juni 1990 Nelson Oduber a bisa cupresion a worde eherci ariba su persona pa tranca e conferencia. Te awe Nelson Oduber no a denuncia ningun hende y ningun investigacion a tuma lugar ni ningun detencion a tuma lugar. Pesey ningun hende sa ta kende a eherce presion ariba Nelson Oduber.

Watty Vos a sigui muestra Huez cu durante un conferencia di prensa dia 24 di Januari 1992 Nelson Oduber a bisa cu e no tabata na haltura cu personanan a worde tuma den servicio. Dia 27 di Januari un corant ta publica e pruebanan cu Nelson Oduber

tabata na haltura pasobra dia 27 di November 1991 e mes a firma pa e personanan aki drenta servicio.

Otro corant hasta a publica cu Nelson Oduber ta mentiroso. Watty Vos a bisa Huez cu ta pasobra Nelson Oduber intencionalmente ta nenga di papia berdad e ta worde critica. Pues su propio actitud ta pone cu respet pa su persona ta bay perdi. E palabra mentiroso tabata ofensivo pa Nelson Oduber pasobra e no a tuma ningun accion contra dje.

Watty Vos a muestra ariba declaracionnan di Nelson Oduber mes y tambe ariba e incidente dilanti porta di Misa caminda Nelson Oduber a bay discuti cu un joven politico. Di tur caminda na mundo Nelson Oduber a dicidi di bay reclama y intimidar e politico aki dilanti porta di Misa. Pesey e ta worde critica.

Den su defensa dilanti Huez Watty Vos a muestra con tolerancia di e Promer Ministro a worde exponi continuamente den prensa. Entre otro el a muestra ariba un articulo cu ta bisa: "E Promer Ministro ta e ultimo cu por papia. E reputacion di su gobierno ta asina abao pa tur e acusacionnan contra Ministro di Husticia sin cu e ta tuma accion. Cu su silencio e Promer Ministro ta admiti cu loke a worde bisa ta berdad."

"E lazonan entre Ministro di Husticia y traficantenan den droga por worde consider confirm. Ni siquiera e por a logra hiba un caso dilanti Huez. Ademas Promer Ministro tin na su man robez e Ministro di Obras Publico cu henter luna tabata negativamente den publicidad".

Contra e publicacion aki tampoco Nelson Oduber a tuma accion. E no a sinti su mes ofendi aunke e acusa di ta tolerante den tur loke su colega a haci.

Watty Vos a bisa dilanti Huez cu pa su actitud diariamente Nelson Oduber ta worde ridiculiza den prensa. Caricaturanan ta worde publica critica su actitud y di caricaturanan ta presenta na Huez y a worde muestra cu Nelson Oduber ta busca esaki pasobra el a actu robez na lugar robez.

Ami MELONY MICHELLINE PAESCH

Representando O'STAD ta invita boso tur pa mi Get-Together pa nos bai bula manera un jojo na R.C.A. Diasabra dia 15 di February. Mi ta warda boso tur trempa pa warm-up. No lubida mi ta number 2. Corda mi ta conta cu boso apoyo.

Boso amiga

MELONY

